



Anwar bersama hadirin pada Program Temu Anwar di Kuantan yang turut dihadiri Wan Rosdy dan Fadhlina. (Foto BERNAMA)

'Gaji lulusan TVET RM2,500-RM3,000'

PM minta perkasa pendidikan lahir graduan lebih terlatih

Oleh Asrol Awang
bhnews@bh.com.my

Kuantan: Pemeraksanaan Pendidikan dan Latihan Teknikal dan Vokasional (TVET) di Malaysia perlu bagi melahirkan graduan lebih terlatih, sekali gus menikmati gaji lebih baik.

Perdana Menteri, Datuk Seri Anwar Ibrahim berkata walaupun peratusan lulusan TVET yang mendapat pekerjaan tinggi, namun beliau tidak berpuas hati dengan gaji diterima graduan berkemahiran berkenaan, yang secara umumnya masih di bawah RM2,000 berbanding pekerja TVET luar negara, yang menikmati gaji lebih baik.

"Sasaran harus antara RM2,500 hingga RM3,000 atau lebih baik daripada yang ada se-

karang. Ini terbukti dan bukan teori. Di Jerman, pengalamannya lebih tertumpu kepada TVET. Lulusan TVET upahnya lebih tinggi. Kita puluhan tahun pun gajinya mendatar ... naik sedikit," katanya.

Anwar berkata demikian pada Program Temu Anwar Kuantan di Kolej Kemahiran Tinggi MARA (KKTMM) di sini semalam.

Hadir sama Menteri Besar, Datuk Seri Wan Rosdy Wan Ismail; Menteri Pendidikan, Fadhlina Sidek; Timbalan Menteri Perdagangan Dalam Negeri dan Kos Sara Hidup, Fuziah Salleh; Pengerusi MARA, Datuk Dr Asyraf Wajdi Dusuki dan Ketua Pengarah MARA, Datuk Seri Azhar Abdul Manaf.

Sementara itu, Anwar meminta golongan muda tidak mudah tertipu dengan berita yang dipaparkan di media sosial.

Beliau berkata, semakan perlu dilakukan sebelum mempercayai berita di media sosial yang belum diketahui kebenarannya.

"Media sosial ada peranan dan ini teknologi baharu yang kita manfaatkan.

"Sebab itu, saya kata kita kena fikir sebab kadang-kadang banyak penipuan. Ada tok guru pakai serban dan jubah bercakap satu minit. Kita kagum. Siapa yang sokong parti saya Allah SWT restui, siapa yang tidak sokong, jadi musuh Allah.

"Kalau orang tidak fikir, tok guru cakap itu betul sebab itu kita kena 'check' (semak) sama ada betul atau tidak.

"Ada satu lagi kenyataan. Anwar selaku Perdana Menteri zalim dan menindas serta menganaktirikan negeri pembangkang termasuk Terengganu, Kelantan, Perlis dan Kedah.

"Ini bila ada anak muda baca, marah dan cakap Anwar zalim. Ini cerita satu minit, kita hukum orang. Orang yang bercakap menipu, orang yang mendengar tertipu.

"Sebab itu perlu semak. Bila semak dan saya sudah jawab di Parlimen dalam Belanjawan Negara di bawah pemerintahan Kerajaan MADANI, peruntukan untuk Kelantan, Terengganu, Kedah dan Perlis lebih tinggi dan paling tinggi dalam sejarah daripada tahun sebelumnya," katanya